

十住斷結經卷第十二

談十

姚秦沙門竺佛念譯

等慈品第二十二

爾時最勝菩薩前白佛言云何菩薩入等慈
三昧遍觀三千大千世界人陰神陰諸龍鬼
界一身二身至百千身云何菩薩以神足力
從一佛國至一佛國如人遊虛亦無罣礙爾
時世尊告最勝曰快哉斯問甚奇甚特吾今
與汝敷演其義諦聽諦聽善思念之一切諸
法虛寂無本成道衆智尋亦無迹菩薩入定
正受三昧遍觀三千大千世界其中衆生有
形之類觀五陰身生者滅者爲所從生爲所
從滅復入空界地水火風一一分別了無所
有法起則起法滅則滅最勝當知昔我久遠
修菩薩道禪定一意執心不亂入不動三昧

觀虛空衆生無限無量不可稱記隨其形類
而教化之其中衆生有婬怒癡無婬怒癡有
愛欲意無愛欲意有瞋恚心無瞋恚心菩薩
權慧隨類而入形與彼俱稱適一切心入定
意終無亂錯彈指之頃入於百千諸佛刹土
或以法性慧觀教化或以空法苦空非常導
以正法菩薩所化亦無邊涯以十善之行而
教授之云何爲十先淨國土不計其功敷演
其慧明知無礙坐道樹下心無怯弱降伏魔
怨令知邪趣遊處境界度人無量心如地界
忍而不動分別根門難易之相純淑之行靡
不斟酌一一分別陰持入行色痛想行識觀
內六情去外六塵若眼見色不與眼識外色
內識悉了虛無色爲是誰眼識所在若耳聞
聲不與耳識外聲內識悉了虛無聲爲是誰

耳識所在若鼻嗅香不與鼻識外香內識悉了虛無香為是誰鼻識所在若舌知味不與舌識外味內識悉了虛無味為是誰舌識所在若身知細滑不與識想外更內識悉了虛無細滑為誰身識所在最勝當知菩薩入定一一分別隨類教化或以言教或以神足或以權慧隨類而入無所罣礙是時菩薩復以十法訓化衆生云何為十一者慧根具足定意不亂二者覺意牢固演慧無礙三者敷暢道品具足義趣四者解相玄寂衆好不闕五者解道非道了知虛無六者意崇法輪誨而不倦七者行菩薩道不見己身八者雖度衆生不見有度九者解內外空一而無二十者分別身體不見有化是謂菩薩摩訶薩具足十法便能周旋諸佛刹土從一佛國至一佛

國亦未曾離諸佛世尊菩薩當念修諸總持門云何為總持諸法印可總持菩薩得此總持者於一切法去諸妄想復有普光總持菩薩得此總持者等慈一切不懷顛倒復有慧明總持菩薩得此總持者不淨國土今得清淨復有照曜總持菩薩得此總持者於諸亂意悉無塵翳復有義辯總持菩薩得此總持者習觀衆行入定不動復有法辯總持菩薩得此總持者分別句義不失次叙復有響辯總持菩薩得此總持者觀察音響隨類而度復有應辯總持菩薩得此總持者應適一切具足衆行復有意止總持菩薩得此總持者塵勞結縛永息不起復有意斷總持菩薩得此總持者微察諸法亦無猶豫復有神足總持菩薩得此總持者住壽在世經百千劫復

有根本總持菩薩得此總持者分別根門與
衰不變復有力勢總持菩薩得此總持者修
金剛體無能沮壞復有覺意總持菩薩得此
總持者敷演諸法開悟一切復有道具總持
菩薩得此總持者觀了三世因緣法本復有
定意總持菩薩得此總持者於諸亂想懷來
道故復有權慧總持菩薩得此總持者應適
無方亦無覺者復有布施總持菩薩得此總
持者解知三事悉無所有復有持戒總持菩
薩得此總持者不見修戒及以毀者復有忍
辱總持菩薩得此總持者不見恚忍及以亂
想復有精進總持菩薩得此總持者不見進
業及以懈怠復有正受總持菩薩得此總持
者萬響雷震衣毛不豎復有慧空總持菩薩
得此總持者包識萬智暢演無礙復有無礙

總持菩薩得此總持者於諸通慧無所罣礙
復有曠遠總持菩薩得此總持者雖百千身
還合爲一復有教授總持菩薩得此總持者
訓以正法言不煩重復有不思議總持菩薩
得此總持者非是羅漢辟支所及復有道具
總持菩薩得此總持者莊嚴刹土不離諸佛
復有降魔總持菩薩得此總持者執意牢固
心不傾邪復有容相總持菩薩得此總持者
一一諸相致百千福復有衆好總持菩薩得
此總持者不見相好瓔珞隨身復有光曜總
持菩薩得此總持者於百千光見化無量復
有度人總持菩薩得此總持者雖度衆生亦
無度者復有廣慧總持菩薩得此總持者意
如虛空無有褊狹復有道具總持菩薩得此
總持者不想泥洹亦不著有復有滅度總持

菩薩得此總持者不見有滅及以生者復有清淨總持菩薩得此總持者塵埃以淨無盡不盡復有無苦總持菩薩得此總持者解苦無苦名曰苦諦復有生習總持菩薩得此總持者習本意緣悉了虛無復有滅盡總持菩薩得此總持者滅習塵勞更亦不造復有聖道總持菩薩得此總持者安處無為永寂泥洹復有止觀總持菩薩得此總持者觀了妙法興衰所趣復有空藏總持菩薩得此總持者於深法要無所罣礙復有法觀總持菩薩得此總持者觀了諸法悉知無主復有淨聲總持菩薩得此總持者口言柔軟如梵天音復有稱可總持菩薩得此總持者為人所說可其心意復有等意總持菩薩得此總持者溫潤流利言不滯礙復有遊處總持菩薩得

此總持者所可教誡無所傷損復有威曜總持菩薩得此總持者在於大眾亦無怯弱復有奮迅總持菩薩得此總持者為師子吼飛落走伏復有戒律總持菩薩得此總持者降伏一切難悟眾生復有趣道總持菩薩得此總持者解知泥洹無起滅想復有法性總持菩薩得此總持者諸諛諂人令見真道復有息意總持菩薩得此總持者不與驕傲生人自大復有通達總持菩薩得此總持者聞彼聖慧不失法教復有興敬總持菩薩得此總持者即棄貢高承事諸佛復有空界總持菩薩得此總持者漸入本淨寂然法界復有無礙總持菩薩得此總持者以達儀軌解諸法本復有無量總持菩薩得此總持者古昔所說亦無窮盡復有強記總持菩薩得此總持

者分別文字知法趣向復有究竟總持菩薩
得此總持者解人本性法界亦淨復有難滅
總持菩薩得此總持者曉衆生淨內外虛寂
復有無際總持菩薩得此總持者解知本無
本無亦無復有瓔珞總持菩薩得此總持者
所說經法無所罣礙復有妙要總持菩薩得
此總持者於盡無盡亦不見盡復有分別總
持菩薩得此總持者非是二乘之所籌量復
有如來總持菩薩得此總持者覺悟衆生趣
寂寞道復有十地總持菩薩得此總持者恒
說無住亦不見住復有陰種總持菩薩得此
總持者分別身本不興染著復有寂寞總持
菩薩得此總持者譬如呼聲亦無音響復有
識性總持菩薩得此總持者悉能思惟不著
文字復有了本總持菩薩得此總持者無言

無說亦無教誡說十復有文字總持菩薩得此總
持者自識宿命知所從來復有法輪總持菩
薩得此總持者無意無想亦無神識復有甘
露總持菩薩得此總持者講誦說法亦無罣
礙復有深入總持菩薩得此總持者一一分
別四句合義復有法幢總持菩薩得此總持
者曉了義理明識法本復有無盡總持菩薩
得此總持者究暢本際不離眷屬復有等覺
總持菩薩得此總持者常講無量無著正法
復有諸法總持菩薩得此總持者翫習諸法
不失次緒復有弘誓總持菩薩得此總持者
解了智慧悉無逆順復有善權總持菩薩得
此總持者隨類適化不懷怯弱復有道慧總
持菩薩得此總持者分別頂法修度無極復
有幻化總持菩薩得此總持者分別法界無

內外性復有中陰總持菩薩得此總持者諸佛世尊所居窠窟復有道場總持菩薩得此總持者十方刹土晃然金色復有降魔總持菩薩得此總持者一切外道靡不降伏復有自守總持菩薩得此總持者護身口意不見有護復有說法總持菩薩得此總持者具足法本無所缺漏復有自用總持菩薩得此總持者觀察無量衆生心意復有慇懃總持菩薩得此總持者方便所說使入道檢復有流化總持菩薩得此總持者分別諸慧不著古今復有柔順總持菩薩得此總持者受法無厭亦無恚惑復有進德總持菩薩得此總持者於諸法本悉無所有復有色像總持菩薩得此總持者其有覩形未曾妄捨復有聲聞總持菩薩得此總持者校計諸法無量無著

復有善順總持菩薩得此總持者聽採法味平等無二爾時世尊說此總持法門時十二億那術人皆得盡信不起法忍復有無央數衆生悉發無上正真道意是時世尊告最勝曰菩薩所行不可思議非是羅漢辟支佛所知等慈三昧定意正受之所感動威神能爾以是之故說大乘律導以正化被以法服是時最勝前白佛言善哉善哉快說斯言一切諸法習無本末解了法性虛無寂寞一一分別皆虛皆寂大乘所演廣及一切聞菩薩行壽終之後皆得生於曠忍世界爾時衆會盡皆猶豫欲得覩見彼佛刹土如來神鑒尋知衆生心之所念即以神足出頂光明普照三千大千世界及彼曠忍無量刹土曠忍佛名號曰無盡順執總持強記不忘殊特之法恒

以在前從恒沙劫供養諸佛積累道法自致得是無上等正覺佛告最勝菩薩當念修行十法云何爲十一者分別法界了知虛無二者解身虛寂內外無主三者四大覺意不倚有餘四者於一切法不見滅度五者身口意行寂寞不住六者護戒無戒亦不毀戒七者無放逸行檢心爲本八者誓願成道不捨本志九者不思議法度難悟者十者衆行清淨所行不重是謂菩薩摩訶薩之所修行十法之本復次菩薩次當習於十法之號云何爲十一者戒具清淨無放逸行二者聞以施惠不毀法界三者分別陰入了知虛寂四者知四非常悉歸磨滅五者十八難解陰持入病六者具足誓願諸佛加歎七者未立根衆生安處無爲八者菩薩入定無能亂者九者遍

觀一切內外諸行十者自觀身本生滅之相是謂菩薩摩訶薩當念修行十法之本便得自致成最正覺復次菩薩復當習定正受三昧所謂三昧者等觀三昧菩薩得此三昧者建立慧觀不爲放逸復有三昧名曰攝意菩薩得此三昧者能攝衆結不令縛著復有護戒三昧菩薩得此三昧者守身口意不生塵勞復有平等三昧菩薩得此三昧者意如虛空不與二想復有大寶三昧菩薩得此三昧者演七覺意無盡之寶復有道樹三昧菩薩得此三昧者道華敷榮見莫不歡復有海量三昧菩薩得此三昧者非是二乘所可斟量復有入室三昧菩薩得此三昧者深要法藏靡不斟酌復有月光三昧菩薩得此三昧者普遊諸佛往來周旋復有月明三昧菩薩得

此三昧者普躍一切靡不蒙光復有玄鑒三昧菩薩得此三昧者解了三世無起滅法復有無憎愛三昧菩薩得此三昧者怨讎平等視如赤子復有大哀三昧菩薩得此三昧者視一切衆如父如母復有慈悲三昧菩薩得此三昧者爲一切衆爲其雨淚復有愍哀三昧菩薩得此三昧者亦無吾我及人壽命復有無想三昧菩薩得此三昧者便能轉於無上法輪復有行苦三昧菩薩得此三昧者於阿僧祇劫不唐其功復有建力慧戒三昧菩薩得此三昧者不見吾我清淨之行復有離身三昧菩薩得此三昧者去離繫縛亦不毀戒復有吾我三昧菩薩得此三昧者於彼此岸亦無染著復有玄通三昧菩薩得此三昧者悟法忍辱無寂不寂復有清白三昧菩薩

得此三昧者於清白行思惟分別復有相應三昧菩薩得此三昧者與相應法不起不滅是謂菩薩摩訶薩正受三昧遊至他方諸佛刹土事事供養諸佛世尊亦不恐懼無所畏難正使身壞於中命終節節離解自觀其身如草木牆壁不與染著而行忍辱彼聞惡言不以為感雖遇歡樂亦不爲慶尋其言教亦無處所曉了所言亦無本末本無之心各各無實是謂菩薩摩訶薩清淨定意彼雖亂心十心無所結亦不在此復不在彼於內外法皆悉清淨以觀如此則爲忍辱是謂菩薩摩訶薩身口意淨建立慧忍復次最勝菩薩摩訶薩當復修行精進定意長諸善法無所漏失觀其法界不增不減無漏慧觀以爲法御復當思惟觀倚世法不見諸法有成就者不成

就者不見正諦及與顛倒不隨不捨亦無去就是謂菩薩摩訶薩珍寶積聚無盡之藏不見去來現在之法何所從來何所從去來亦無處去亦無跡賢聖八道諸法之首一一分別賢聖四諦去離顛倒妄想之行為人說法無所滯礙解了衆生虛而無實推尋諸法亦不可得所以然者法法相生法法相滅人不離法法不離人人自虛寂法亦虛寂如人自然法亦自然解自然者乃應無上正真之行便逮佛法無盡之行其有求法若以求者方當求者三世無著無所染汙彼以求此彼求此已亦無所得亦無所失是謂最勝菩薩摩訶薩建立妙慧精進之行最勝當知菩薩摩訶薩復當思惟禪定之行正受三昧不毀法戒平等無二亦不見二亦不成就非不成就

彼於禪定而以正受一切諸定不起亂想諸法無想亦無放捨解了內外悉無有主是謂菩薩摩訶薩一意正受不毀禪定亦復不見有合有會捨諸境界無有去離行無著禪意趣無難是謂菩薩摩訶薩不立於法亦不離法恒以一意諸法自然解了諸法無生滅想非身非心所能忖量思惟定意平等無二志性所趣無應不應亦不見應分別十二因緣之本緣癡有行緣行有識緣識有名色緣名色有六入緣六入有更樂緣更樂有痛緣痛有愛緣愛有受緣受有生緣生有老死愁憂苦惱不可稱計取要言之五盛陰身危脆之形不可久保菩薩是時等行本無分別色痛想行識悉了虛寂復以正受於本淨法亦無染著亦不見色解色無色度於一切顛倒之

行是謂菩薩摩訶薩禪定一意非是羅漢辟支佛所及外道五通雖壽無量由失神足不至究竟禪定之人正受三昧住壽一劫復過一劫不以為難以得禪定出智慧上除棄塵勞不與妄見是謂菩薩摩訶薩志願于道開化衆生隨形應適隨病投藥復以空性慧觀之法入等慈三昧遍觀三千大千世界轉至恒沙諸佛刹土應度衆生悉令解脫是則如來禪定正受皆使黎庶至于滅度是謂菩薩摩訶薩建立等慈定意所濟無量不可稱限是謂最勝如來神德巍巍如是夫欲觀法當以慧眼亦非肉眼亦非天眼亦非羅漢辟支所觀以觀諸法解諸法寂解諸法淨解諸法虛解諸法定是謂菩薩摩訶薩無限無量弘誓之心無行無處亦無所入諸法寂然定者

所習非亂者所行普觀諸法悉皆如是如是觀者是為法觀法觀菩薩不見諸法之所歸趣其有觀法而不分別斯等之類關於道場不至究竟不以正法而成定意菩薩當念除去妄見無求無取亦不橫買求受重福知內外法悉皆虛寂是謂菩薩摩訶薩入等慈三昧觀了諸法悉無所有以無所有乃名見法夫見法者無我無人無壽無命斯皆假號非真實法有為之法非無為境界無為之界非有為之法菩薩解知有為無為有漏無漏是常非常我人壽命悉無所有是為菩薩摩訶薩分別定意無生滅法假使菩薩觀諸法相解知衆相虛寂無二亦不見二解二無二乃應定意於顛倒法解無所有不見有正趣於道者不見有邪當趣諸見蓋於衆生無量之

慧皆發大哀淨佛境界淨佛刹土從一佛國
至一佛國承事供養諸佛世尊復以神通明
慧之觀普察三千大千世界頗有衆生諸根
純淑不遇賢聖墜于三途是時菩薩要住拔
濟使不彫落或復是時菩薩達士因度衆生
兼復造緣周旋往來不唐其功彈指之頃遊
于百千正受定意建立慧觀修諸功德若行
施時計天人本亦無施者解知三事悉無所
有是謂菩薩乃應於施若復菩薩以律訓誨
解知犯戒及以禁律亦無所有無戒不戒乃
應戒也或復菩薩恒行忍辱見行忍者代其
歡喜設遭恚怒不懷憂感懈怠忍辱悉無所
有亦非一二至于百千解忍無忍乃應忍辱
復次菩薩常行精進見精進者代其歡喜設
遭懈怠不以爲恨解知懈怠及以精進一而

不一亦不有二亦不有進亦不有怠解進怠
虛寂乃應精進復次菩薩若行若坐常若一
心禪定正受未曾虧損天雷地震萬響俱作
專心一意無能移轉動菩薩心解知定亂悉
無所有解定無定乃應定意復次菩薩智慧
所潤澤及黎庶包識萬機應適無方暢達演
說不毀佛教平等慧觀不見賢愚解慧無慧
及與愚惑悉無所有亦不見有亦不見無有
無悉虛空寂無二是謂菩薩應於智慧如是
清淨諸法之相亦不見相非不有相解相無
相乃成相好拔濟衆生至無爲岸復次菩薩
復入空定遊虛空界一一分別空界衆生或
以言教或以神足或以光相或以苦行而教
化之普使衆生得入道檢復次菩薩行無相
法除去想著顛倒之行復遊他方諸佛刹土

恒以無相不變易法訓化衆生普至無爲復次菩薩行於無願不求三界受有之報不倚著人不著相好分別內外五陰成敗色痛想行識外塵內入一一分別虛而不真如是最勝菩薩大士發大弘誓度衆生類不見有度尚無衆生況有度者是謂菩薩摩訶薩建立等慈定意普使衆生速得慧根爾時世尊說此等慈品時十四那術人皆發無上正真道意八千菩薩尋於座上速得等慈三昧法界品第二十三

爾時世尊放舌相光明普照三千大千世界復照十方諸佛國土四維上下靡不蒙照復照東方八十四億江河沙數寂寞世界諸佛普集無有二乘恒講菩薩殊特之行分別世界各有次第吾亦從彼來至忍界所以然者

發願探籌無錯亂故佛告最勝今我自憶在彼佛衆一億諸佛同時取籌我爲元首當此世界慈氏元吉師子勇慧德普廣聞金顏玄寂寶雄常悲鮮潔弘誓如斯等佛一億如來同時受籌適此忍界佛告最勝及來會者諸佛世界不可思議改形變化權現無方汝等焉知慈氏菩薩方習菩薩行乎莫造斯觀所以然者慈氏積行恒沙數劫先以誓願成等正覺吾方習行而在其後或現苦行或現光相或現菩薩儒童弟子隨人本行而爲說法慈氏菩薩在彼座上佛告彌勒現佛光相翼從多少爾時彌勒隱菩薩身還現佛形刹土國界弟子菩薩不可思議衆會見之歎未曾有無形自然色相自然諸法自然一切諸佛亦復自然時彼大衆復見東方八十四億江

河沙數寂寞世界諸佛世尊論講菩薩殊特之行千八百微妙法門何謂千八百微妙法門菩薩習於本淨法門獲此法門者不於本際而受其證復有無言說法門菩薩得此法門者遊虛空界無能覺知復有無所得法門菩薩得此法門者雖度衆生亦不見度復有無所持法門菩薩得此法門者解知本淨內外無主復有名號法門菩薩得此法門者一切諸法虛而無實復有成就法門菩薩得此法門者雖處有為不著有想復有化識法門菩薩得此法門者入無形界無形教化復有現形法門菩薩得此法門者現形無數而教化之復有因緣法門菩薩得此法門者為彼衆生而造因緣復有法聲法門菩薩得此法門者但聞音響不見其形復有離有法門菩

薩得此法門者不見生滅著斷之法復有解脫法門菩薩得此法門者不見泥洹有趣滅度復有深奧法門菩薩得此法門者分別如來祕要之典復有無色像法門菩薩得此法門者入無色定而教化之復有無觀行法門菩薩得此法門者佛法無教亦無處所復有數息法門菩薩得此法門者諸法無數解息無息如是最勝菩薩摩訶薩獲如此等千八百微妙法門時諸衆會聞彼諸佛說此微妙法門盡於座上得盡信法忍無數衆生趣小乘者皆發無上平等道意爾時世尊及以彌勒還攝光明從面門入如來大哀巍巍若茲開化衆生不可稱量各使至趣令立堅固爾時衆會復作是念向者我等皆共普見寂寞世界如今忽然悉無所有將非幻化野馬水

影乎復非夢鏡恍惚耶爾時世尊即知衆會
心中所念便告舍利弗曰云何舍利弗汝頗
曾聞如來與汝說聲聞行是有爲法是無爲
法是有漏法は無漏法是眞實法是非眞實
法是現法是非現法是塵勞法是非塵勞法
是有數法は無數法是有著法は無著法是
有習法は無習法是瞋恨法是非瞋恨法是
可捨法是非捨法非凡夫法是非凡夫法是
賢聖法是非賢聖法此意止神足法此非意
止神足法此根力覺道法此非根力覺道法
此學法此非學法此聲聞法此非聲聞法此
緣覺法此非緣覺法此菩薩法此非菩薩法
此佛法此非佛法云何舍利弗汝曾聞如來
說此言教乎舍利弗對曰非也世尊佛告舍
利弗我今猶尚在聲聞衆不說斷漏有緣著

想況當演教有窠窟乎此事不然說法論講
悉無處所無言無教亦無法相法出響應豈
有法也云何舍利弗今當引譬智者以譬喻
自解猶如士夫勇猛之人觀虛空界悉了無
形然復彼人意欲規郭以衆彩色欲盡虛空
或作天像或作人像或作龍鬼神旃陀羅像
或作蚰飛蠕動畜生之像云何舍利弗彼人
施意寧能不乎舍利弗對曰非也世尊甚難
甚難至未曾有佛告舍利弗如來權化不可
思議施設言教甚難於彼所以者何一切衆
行有爲法無爲法有漏法無漏法道法俗法
十二因緣及六識身四意止四意斷四神足
五根五力七覺意八直行過去當來現在諸
佛無形無像不可覩見亦無取捨亦無聚散
不可携持而不可得虛空境界虛寂無二諸

佛世尊遊諸方界爲一切衆生講說言教實無名號強爲假號實無文字強爲文字實無法性而說法性復次舍利弗菩薩摩訶薩以權方便應適衆生隨彼根本此乃甚難設有比丘僧比丘尼優婆塞優婆夷篤信如是虛無寂法具足衆行便能成就如來相好從一佛國至一佛國承事供養諸佛世尊復於彼佛得強記總持亦復受此深妙之義轉復演布咸使聞知菩薩摩訶薩當念具足七無著法云何爲七解一切有悉無所有不染於有亦不見有現其形像亦無色相猶無有佛況色相乎一切世界亦無端緒況當有本而可推耶衆生根本無窮無底誰能發意斟量其行法自然生法自然滅亦復不見有生有滅諸法如化諸法如幻亦復不見幻化野馬諸

法自然諸法無生亦復不見生滅著斷是謂舍利弗菩薩摩訶薩成就此七無著法者便能具足一切衆行漸漸得至成菩薩位坐佛樹下降伏魔怨衆德著積光相具足從第一住乃至十住於其中間未曾退轉恒爲諸佛所見擁護天龍鬼神乾沓想阿須倫迦留羅旃陀羅摩休勒供養華香作倡妓樂被服幢幡轉加功德威神扶接自上無上至真之道佛復告舍利弗自念我昔修菩薩道或爲儒童或爲梵身或時出家修沙門律供養江河沙數諸佛世尊或以頭目國財妻子或以醫藥四事供養但聞諸佛論講苦義空義非身之義或說六度空無相願或說禁戒學道之法或說忍辱仁和之教或時隱處經劫不起或入禪定形神不動皆由內法未成就故佛

復告舍利弗吾始從寂寞世界諸佛世尊即得聞此深妙之法諸來菩薩大士集者應時速成柔順法忍爾時衆會諸在座者二萬四千衆生應時逮得起法忍去來諸佛及現在者皆共宣傳頌暢深法悉無處所亦復不見我人壽命觀察衆生根本純淑衆生有想以無想教授衆生有念以無念教誡衆生有礙示以無礙若有善男子善女人誦誦善持此深奧法若復演布爲他人說其福功德不可稱限若有學人修菩薩道慈悲喜護愍傷一切欲令成就菩薩位常當修持深奧法藏若善男子善女人遍滿三千世界受持五戒遍行十善四禪四等四空定智不如一聞斯深奧法若不能多思惟亦可七日若不能七日六五四三乃至一日若不能一日彈指

頃可云何舍利弗如汝聲聞其數彌滿十方世界四事供養衣被飯食牀褥卧具病瘦醫藥從億億劫復過億億劫不如一聞深要之法所以者何菩薩法藏珍寶之聚若復演說一句之義無常苦空非身之義三脫法門及四明慧空無相願虛寂之行不生不起無滅盡行如是菩薩摩訶薩是則安隱無量德行福不可限無以爲喻若有菩薩以限礙身修有爲法教化衆生使充所願然彼之類未曾更聞無爲之道欲履菩薩深奧法者此事不然若有菩薩定意正受從無量法宣暢演布深奧法典聞無爲法諸法虛空悉無所有是則深義無能及者是故菩薩若欲具足衆生願者欲與他人說其義者復欲宣暢如來菩薩祕要法者欲使衆生成四果證者常當念

學此深法要佛復告舍利弗昔吾遊學爲善
薩行常習六度四等大慈加被衆生演甘露
味或演言教或賢聖默然或現神足或以善
權巧便或以神通五道或以一道周旋或以
辟支飛鉢虛空或以聲聞稟受言教或現儒
童狀如無知舍利弗當知菩薩教化權現無
方不可窮盡隨世習俗隨類而入亦入於地
亦入於水亦入於火亦入於風菩薩分別四
大本源皆無有主分別地界內外虛寂水火
風界亦復如是復觀衆生有婬怒癡無婬怒
癡有愛欲心無愛欲心有憍慢意無憍慢意
有定意無定意有亂心者無亂心者菩薩悉
皆分別或以安般守意或以惡露不淨觀或
以泥洹滅盡之法或以有爲無爲法或以有
漏無漏法或以俗法或以道法或以神通漏

盡之道而教化之吾曾遊處通慧世界爲一
衆生十二中劫入禪定意形神不動不辭劬
勞待而教化此衆生者豈異人乎莫造斯觀
卿欲知者今最勝菩薩是也最勝菩薩在通
慧世界生豪族家由宿積德不生貧匱窮困
之家一生二生至百千生乃至十二中劫受
形常在豪貴不處卑賤吾亦入定去彼不遠
觀其心意於百千劫不解一句深奧之法後
能自悟豁然心開自歸我身欲聞深妙無量
法典而爲說法無盡之藏所謂無盡藏者分
別音響或以一音遍滿三千大千世界或以
一句應適一切衆生心意所吐言教過於梵
音復有六通無盡藏往詣十方諸佛世界承
事供養如來世尊稟受深妙難有之法於諸
苦行過於精進持戒忍辱精進一心智慧善

權復有無盡藏使有四意止四意止者無漏法行法意止者泥洹徑路餘者凡夫之所修四意斷四神足五根五力七覺意八賢聖道報應果證悉無所有亦不見有是謂菩薩無盡之藏何者可盡平等光曜善講本性是可盡也法性相修為可盡也心所思惟為可盡也思惟五陰為可盡也曉了十二因緣為可盡也知內外四大為可盡也舍利弗對曰非也世尊非是如來所能究盡佛復告舍利弗復有四事法無盡之教為辯才門云何為四一者分別無盡慧二者分別無盡慧明三者思惟強記總持四者分別辯才無外是謂舍利弗四無盡之藏菩薩所可修行復有四無盡之藏不可攜持云何為四一者其性難攜放逸不住二者道心難攜本性甚深三者入

諸本際習無本末四者入眾生意了知無法是謂菩薩摩訶薩無盡之藏佛復告舍利弗菩薩復有四牢固無盡之藏為辯才法門云何為四一者志願牢固不著邪部二者本行清淨不與塵勞三者古佛言教立忍無恚四者隨緣造行不失本誓是謂菩薩摩訶薩無盡之藏辯才法門在道樹下降伏魔怨意無怯弱復有四轉輪法門無盡之藏云何為四一者所言至誠不毀他人二者究盡緣起知所從生三者訓誨眾生初無懈倦四者分別明慧上菩薩位是謂菩薩摩訶薩第十不毀法戒無盡之藏菩薩摩訶薩常所修行佛復告舍利弗菩薩摩訶薩復有四無盡之藏成就法界云何為四一者照曜法界通達往來二者照曜法性解無所有三者分別肉眼天眼慧

眼法眼佛眼云何為肉眼觀觀色像不與眼識云何為天眼所謂天眼者觀天光像不見報應慧眼分別不見塵垢法眼清淨具足六度佛眼了朗觀相無相四者照曜報應不著三界是謂菩薩摩訶薩無盡之藏成就法界佛復告舍利弗菩薩摩訶薩復有四無盡之藏云何為四一者精進不定意有求慧意無求慧意有盡意無盡意有得意無得意內外分別悉無所有是故舍利弗行權菩薩在在處處周旋教化精進為上修行禁戒勤力為本從諸世尊求積功德聞法歡喜合集明慧布演道教亦無言教當來過去現在諸法慧觀堅固乃為真教如來所說不以文字聞者清淨說法亦淨是為積慧功德立忍堅固立不退轉是謂舍利弗不以貪色亦不倚色非

不有色解色無色故曰法性正使三千大千刹土香熏細滑繒綵幢蓋來供養者不乎用喜遠離懈怠不懷怯弱避貪亂意除瞋恚心成等正覺演布祕要乃得成佛捨身所安立弘誓心代彼眾生受其苦惱精進樂法乃使眾生進入法室至修道者諸天證明天龍鬼神捷沓愁阿須倫迦留羅旃陀羅摩休勒人與非人悉來供養善男子善女人扶佐勸助使成佛道發願堅固要使成慧中無有退度諸因緣墮三塗者無識無覺亦無究竟是謂舍利弗菩薩摩訶薩修無想法法無言教法乃能得成如來聖教爾時座上諸來會者聞斯深法皆發無上不退轉地爾時舍利弗前白佛言向所聞者斯等諸人久如成佛乎佛告舍利弗斯等諸人二百無央數劫當成為

佛皆同一號無垢超德如來至真等正覺明
行成爲善逝世間解無上士道法御天人師
號佛世尊世界曰清淨劫名難度彼佛世界
純以一乘無有聲聞辟支佛名常論菩薩無
量德行土地平正無有山河埵阜河澗谿谷
若干種色如天統縱無有日月光明所照自
體衆相光光相照衆德廣普衆生所念萬若
千想所以然者以其法界無差違故彼佛世
界食自然甘露著劫波育衣猶如第六天樂
所居土地豐熟五穀平賤七寶具足金銀珍
寶碑磔碼碯真珠琥珀有轉輪聖王名曰兩
華七寶導從所謂七寶者一名輪寶所謂輪
寶者縱廣十四肘純以七寶輪有千輻輻輻
有相王意欲東輪即前導二者象寶所謂象
寶者色如白雪口有六牙牙牙有相王欲乘

象遊觀世界彈指之頃遊于世界亦無有難
三者馬寶所謂馬寶者身紺青色及朱髦尾
乘虛而行脚不躡地馬一鳴吼震于世界靡
不聞者王意欲乘東西南北彈指之頃皆悉
周遍四者玉女寶所謂玉女寶者身作優鉢
蓮華香口作牛頭栴檀香純肉無骨爲人端
正不肥不瘦不長不短不白不黑備具女姿
六十四變王意欲納輒便在前五者珠寶所
謂珠寶者方一仞高七仞王意欲試彼珠寶
者夜非人時即召軍馬集四種兵夜出珠寶
著萬丈臺頭普照世界靡不蒙光珠自往來
隨王所念六者典藏寶所謂典藏寶者是時
轉輪聖王意欲遊行方域世界路由大海無
底之源王意欲試典藏證驗即勅御者且止
此海吾欲停息便勅典藏寶吾今須金銀珍

寶磔磔碼碼珊瑚琥珀水精瑠璃御能得乎
時典藏寶尋跪水中以器斟水隨意所念七
寶自至七者典兵寶所謂典兵寶者王意欲
集四種兵衆即告典兵寶曰吾欲檢校四種
兵衆使時不移能得辦乎彼典兵寶復白王
言不審聖王須兵多少王告之曰吾須前後
左右各各萬廂時彼典兵寶隨王教令即如
其言四種兵集所謂四種兵者象兵馬兵車
兵步兵一一兵者將從有十四種兵各各亦
然爾時佛告最勝諸來會者爾時轉輪聖王
豈異人乎莫造斯觀所以然者今最勝菩薩
身是也所在變化言聲柔輒人民之類皆承
法音寂然恬怕講度無極四恩四等六重之
法善權方便入滅盡定離欲無垢空無相願
無爲之法無生滅法無端緒法其有萌類諸

天世人在彼境界者分別聖慧無漏道根或
示音響指授明法或以苦切之教將入法律
或以神足變化光明教授欲使衆生漸入究
竟佛告舍利弗一切衆生無我人相諸法本
淨諸法無形無著斷法諸法無壞觀了佛土
悉無所有又復舍利弗十二因緣五陰六衰
都無形像如來八種音聲不男音不女音不
強音不輒音不清音不濁音不雄音不雌音
此由檀度受實果證解知清淨照于法界或
以一音遍滿三千十方世界吾曾遊處野馬
世界去此七十二億江河沙數諸佛刹土在
彼周旋放大音聲遍滿彼佛刹土其聞音者
百億衆生立不退轉皆發無上正真道意時
我弟子名曰目連神足第一登一須彌山復
登一須彌山如是經劫從劫足下躡地時目

捷連在野馬世界放大音聲遍滿三千十方
世界於彼音聲而演斯教如來說法未曾有
行亦不見行非不有行解行無行故曰清淨
諸法無像亦無音響復說四諦如爾法性解
苦無苦不住於苦入如此慧故曰苦智因集
暢本解集無集不見有集故曰集智知盡處
所由盡而生由盡而滅亦不見盡是謂盡智
無為道者不見窠窟去來今佛之所稱譽今
佛說者亦無有道去來所說亦復如是道無
形像不可覩見解道無道故曰道智是謂菩
薩摩訶薩分別道義時彼野馬世界一切衆
生之類但聞其聲不見其形時彼大衆愕然
有怪斯是何人布大音聲震動世界兼復演
說深奧之義時彼如來知衆生心中所念便
告目連曰捨汝神足可在此衆現其形像時

目捷連即如其像忽然以至處大衆中彼菩
薩等身長八萬四千由旬佛身長十六萬八
千由旬衆會見目連形體著衣持鉢狀如沙
門皆共愕然怪未曾有此是何像為是畜獸
為是人耶是時彼佛知衆會心中所念即告
之曰汝等勿生此心所以然者去此七十二
億江河沙數諸佛世界有佛世界名曰忍土
彼有佛名曰釋迦文如來至真等正覺十號
具足於五濁世出現於世恒以文字教授衆
生人壽百歲過者無幾以四諦至真分別義
趣其說慧無處無著此目連比丘是彼神足
第一弟子彼佛即告目連曰現汝神足此會
大衆虛想欲見時目捷連承佛教誡即從座
起頭面禮足忽然不現入無礙三昧定意盡
接十方諸佛刹土安著右掌左手接彼佛土

懸處虛空各各共見目連神足欲覩其形不能得見時彼菩薩尋自歸命彼佛世尊伏惟天師當見拯濟佛告無苦終不有損爾時彼佛告目連曰止止目連捨爾神足令此菩薩羸識軌迹爾時目連承佛教旨即捨神足復坐如故時彼菩薩前白佛言彼忍刹土釋迦文佛以何教化云何說法復以何道訓誨衆生以何權智周旋往來佛告諸菩薩彼刹衆生剛強難化互相是非各自謂尊是以如來以苦切之教引入道門猶如龍象及諸惡獸隴悞不調加之捶杖令知苦痛然後調良任王所乘彼土衆生亦復如是以若干言教而度脫之或以苦音說苦音響集盡道者亦復如是時彼菩薩歎未曾有善哉善哉世尊彼佛如來執勤勞行甚爲難有能於五鼎沸世

教化衆生演布大道寂然滅盡歸於無爲也

十住斷結經卷第十二

音釋

編伴緬切 統統於阮切 綖綖夷然 輻音福
 也急也 統統於阮切 綖綖夷然 輻音福
 也鬚音毛 躡尼輒切 躡音拘也 隴悞隴悞切 換換即
 也計切 隴悞隴悞切 換換即
 惡不調也